

Regional News Unit AIR Aizawl  
Tuesday, June 04, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Tun atanga hun rei lote, zing dar 8 atang khian Lok Sabha inthlan vote chhiar tan a ni dawn.
- Aizawl-a Special Court (Prevention of Corruption) chuan dik lo taka mipui sum hmanga puh, CADC Chairman hlui leh a fapa bakah Deputy Chairman hlui te chu thiamloh chantirin, kum 4 Jail tang tur leh Cheng Nuai 3 theuh chawi turin a hrem.
- Nakin dar 8-a ram puma Lok Sabha inthlan vote tla chhiar turin ram chhung hmun tinah inpeih a ni tawh.
- School Education Department leh National Book Trust-te'n thawhdunna tur thuthlung an ziak.

<><><>

### ELECTION PREPAREDNESS

Tun atanga hun rei lote, zing dar 8 atang khian Lok Sabha inthlan vote chhiar tan a ni dawn.

Vote chhiar tur hian Mizoramah inpuahchahna peihfel vek a ni tawh a. Tun Parliament inthlanpuia Mizoram Returning Officer, Nazuk Kumar-i chuan zing dar 5-ah vote chhiar tur te duty-na tur siksawi fel a ni dawn tih nimin khan a sawi a. Vote chhiar hi zing dar 8-ah tan a nih dawn thu pawh sawiin, vote chhiar hun atana ECI-in Counting Observer 16-a ruat te pawhin Mizoram rawn thleng kim tawhin Aizawlah 5, Lungleiah 2 leh district dangah pakhat theuhin an duty dawn a ni, a ti.

Returning Officer chuan Vote hi round thumah chhiar a ni dawn, a ti a. Mizoram pumpui tan ETPBMS 2,656 dawn niin Postal ballot-ah 2,107 dawn a ni tawh, a ti bawk.

<><><>

### COUNTING PROMO

Lok Sabha inthlan vote chhiar pualin Akashvani Aizawl chuan Special Election Broadcast a ruahman a.

Vawiin vote chhiar ni-ah hian zing dar 7 leh a chanve, zing dar 9 leh minute 55 leh dar 11 leh minute 50-ah te chanchin thar chhiar a ni ang a. Chawhnu lamah dar 1 leh minute 50 bakah tlai dar 6 leh a chanve-ah te chhiar a ni bawk ang.

Lok Sabha inthlan result live-a sawihona hun chu tlai dar 3 atanga dar 4 leh, tlai dar 5 leh minute 20 atanga dar 6 thleng mithiam sawm ten an hmang dawn bawk a ni.

**Akashvani Delhi-ah pawh Special Bullet leh Live Discussion chu zing dar 7 atangin zan dar 10 thleng a awm dawn a ni.**

<><><>

## **SAVE CHITE LUI**

**Save Chite Lui Coordination Committee chu an Chairman Pu Lalduhoma hovin nimin khan thukhawmin tuihna tihpun dan leh lui dunga nungchate venhim dan tur an sawiho.**

**Thutkhawmah hian tuihna a pun theihna tur leh bawlhhlawh lut nasa lutuk tihlem dan tur bakah lui kuang venhim dan tur te leh lua nungchate venhim dan tur te an sawiho a. Heng atan hian project duangin Nodal Department, Environment, Forest & Climate Change-in bawhzui se, an ti a. Chite lui pawhtu khawpui chhung atanga luang lut luite dang venhim leh tihthianghlimna lam chu UD & PA lamin bawhzui se, an ti bawk.**

**Save Chite Lui Comprehensive Action Plan Phase I kalpui zawh tawh a ni a, Phase II angin tunah hian kal chhoh leh mek niin he phase II action plan duangtu hi NERIWALM, Tezpur te an ni.**

**Mizoram sawrkar chuan The Chite Lui (Prevention and Control of water pollution) Act, 2018 a lo pass tawh a. Chu dan chuan khauh takin Chite lui hi a humhalh a. He lui tibawlhhlawhtute hi Warrant tel kher lova man theih an nih bakah bail dil theih loh a ni a. Sawrkar department ten an lo tibawlhhlawh a nih chuan chu department-a head chu a mawhphurtua ngaih tur a ni.**

<><><>

## **GRAFT CASE SENTENCE**

**Aizawl-a Special Court (Prevention of Corruption) chuan dik lo taka mipui sum hmanga puh, Chakma Autonomous District Council (CADC) Chairman hlui leh a fapa bakah Deputy Chairman hlui te chu thiamloh chantirin, kum 4 Jail tang tur leh cheng nuai 3 theuh chawi turin a hrem.**

**Special judge Dr. HTC Lalrinchhana chuan CADC chairman hlui Kali Kumar Tongchangya, a fapa Julius Tongchangya leh deputy chairman hlui Purna Muni Chakma te hi Zirtawpni khan eiruk thubuai-ah thiam loh a lo chantir tawh a. Vawiina hremna tihchhuah ah cheng nuai 3 chawi tur leh kum 4 chhung Jail tang turin a hrem a, pawisa chawi tur hi an pe theilo anih chuan thla 9 dang an tan belh dawn a, vawiinah Jail lama hruai nghal an ni.**

**Kali Kumar Tongchangya hi CADC chairman a nih lai a dan kalha a fapa Julius Tongchangya hna a thun bakah a hlawkna tura thil dik lo taka ti a puh a ni a. Heta hmanraw tangkai tak Purna Muni Chakma leh dik lo taka mipui sum ama mimal hlawkna atana hmangtu Julius Tongchangya te chu court hian thiam loh a chantir a ni.**

<><><>

## **CM**

**Chief Minister Pu Lalduhoma hovin CM Conference Hall-ah Zoram Medical College tihhmasawn zel dan tur vawiin khan rel a ni.**

Chief Minister chuan tunhnaia ruah leh thlipui vanga ZMC in harsatna a tawh chu pawl a tih thu a sawi a. Engkim tluang taka a kal leh thuai theih nan theihtawp a lo chhuahpui thu leh vawiin thlenga a ngaihven zui reng thu a sawi a.

ZMC thawktute pawhin, Disaster Management & Rehabilitation department leh department dangten ZMC harsatna tawh te chu an umzui tha hle tih Chief Minister hi an hrilh a ni.

He thutkhawmah hian National Medical Council endikna an hmachhawn mek dan te, online inspection leh CCTV inspection a kal mek thute tarlan a ni a. ZMC behchhan Helipad leh Fire Station siam thuai chungchang te pawh an sawi a. ZMC hnathawktu, society hnuai lak te leh Mizoram sawrkar hnuai lakte felfai zawka enkawl dan tur pawh sawiin; kum 2019 a a zirchiangtu Committee in report an lo siam tawh te sawi lan a ni a. ZMC thawktute hi Mizoram sawrkar hnuai lakluh vek thain thutkhawm chuan a hria a. Council of Minister thuneihna a nih avangin Council of Ministers a ngaihtuah tura thlen ni se, tiin an rel a ni.

Vawiin thutkhawmah hian Health Minister Pi Lalrinpui leh ZMC hotute bakah Finance, DP&AR, Health & Family Welfare leh Law & Judicial hotute an tel a ni.

<><><>

AMC

Tun hnaia Aizawl Trinity Hospital thlanga phalna mumal nei loa lei a laih avanga leimin nasa tak a thlen avang leh chhiatna tam tak a thlen avangin Pu David Lalhmangaiha, Chanmari, Aizawl chu a hnathawh mek titawp tura hriattir a ni.

Pi C. Lalduhzuali, Sub Divisional Magistrate, Aizawl Sadar Sub - Division, Aizawl chuan nimin khan thuchhuah siamin Pu David Lalhmangaiha, Chanmari chuan Trinity Hospital thlang lamah thuneitute aṅanga phalna mumal awm loa lei a laih avangin May ni 28 ah leimin a thlen phah a, he leimin ah hian Assam Type in pakhat chhia in RCC building Pi Lalthangpui in chu tichhe baw a, heng bakah hian Trinity Hospital transformer hman mek chu tichhia in Damdawiin hian eng an neihloh phah a ni.

Thuchhuah chuan Pu David Lalhmangaiha hi a hnathawh lai mek tawpsan tur leh a tihchhiat zawng zawng sengkawi turin a hriattir a, heng bakah hian Link Road bul thutah retaining wall siam turin a hriattir a, heng bakah hian in a tihchhiat te siam ṅa leh tura thupek chhuahin heng siam ṅa that nan hian ni 30 hun a pe a ni.

Hetih lai hian Trinity Hospital Medical Director Dr K.Lalbiakzuala chuan thuchhuah siamin electric transformer dahna hnuai kawngko laih vanga leimin buaipui a nih laia cyclone Remal rawn ken ruah baw-hawk sur avangin hospital electric supply a khaih-lak hlauhthawn thu-ah ICU damlo pahnih Ebenezer Hospital-ah sawn phei an ni a ti a. Hospital building chu engmah hlauh-thawnawmin a awm lo tih a sawi.

Trinity Medical Director chuan Generator nen electric supply pawh pangngai takin siam that leh nghal a ni a ti a, social media lama hospital building hlauhawm anga tihdarh leh damlo tam takin rawn pan ngam loh phah nan an hmang chu pawl anti hle tih sawiin Hospital building leh a chhunga thawktute leh damlo te tana hlauh turin engmah hlauhthawn tur a awm lo tih a sawi.

<><><>

## COUNTING OF VOTES FOR LOK SABHA POLLS

Tukin zing dar 8 atang hian ram chhunga Lok Sabha inthlanpuia vote tlate chhiar tan a ni dawn a. Ruahmanna engkim peihfel vek a ni tawh. Hemi rual hian Andhra Pradesh leh Odisha-a Assembly bye-election-a vote thlate pawh chhiar nghal a ni ang.

Kum 2024 Lok Sabha inthlanpuiah hian April ni 19 atanga June ni 1 inkar chhung khan thawh 7-in vote thlak buatsaih a ni a. Election Commission chuan vote chhiar chhoh dan dinhmun chu ECI Website - [results.eci.gov.in](https://results.eci.gov.in) ah leh Voter Helpline App-ahte tarchhuah a zel a nih tur thu a sawi a. Voter Helpline App hi Google Play Store-ah download mai theih a ni.



## SCHOOL EDUCATION DEPARTMENT SIGNS MOU WITH NATIONAL BOOK TRUST

Nimin khan School Education Department leh National Book Trust-te chuan New Delhi-ah thawhdunna tur thuthlung an ziak.

He an inremna hi awlsam zawka zirlaite banphaka lehkhabu chhawpchuahna tur Digital Library Platform, Rashtriya e-Pustakalaya a ni a. He huna thusawitu Higher Education Secretary K. Sanjay Murthy chuan Rashtriya e-Pustakalaya chu chhun zan zawma hman tangkai theih a nih tur thu a sawi a, hei hi khawi hmuna cheng tan pawh lehkhabu hlutna tizualtu tur a nih thu a sawi a. Hemi hmang hian state tam tak lehkhabu tha awmna library ban phak lote harsatna sukiantu tur a ni a ti a. Kum 2 kum 3 a liam leh chuan lehkhabu sing chuang chu tawng za chuangin a chhiar theih tawh dawn a ni a ti.



## DELHI WATER CRISIS: SC ORDERS URGENT MEETING OF YAMUNA RIVER BOARD

Supreme Court chuan Sawrkar laipui chu khawlum kara Delhi khawpuia tui tlakchham chungchangah Upper Yamuna River Board thutkhawm hmanhmawh ko turin a hriattir a. Hetah hian Delhi, Haryana leh Himachal Pradesh-te pawh tel tura tih a ni.

Supreme Court-a Vacation Bench luahtu Justice pahnih P.K. Mishra leh K.V. Viswanathan chuan he thutkhawm hi June ni 5-a ko turin thupek an chhuah a. Thukhawm thuchhuak chu Court chuan June ni 6-ah ngaihtuah a ni dawn a, a kaihnawih state-te tihur pawh hetah hian tuk nghal a ni ang.

